

## 2 Juan

He- la- jee' ga-të' to' je- he- ga-sii' Jwaa'

Hee- ja- ju'dsoo' hi- hee- ja- he- hnää' jne' dsa-kyaaahn'

**1** <sup>1</sup> Jnä' dsa- ma-gyuh- kyaah' hnäh' siin' juu' la- kih' dsa-më' hi- na-lleeh' kyaa' Dio kyaah' kih' lä-jëë' jooy' hi- hnaan' lä-kaa- tuh-dsën'. Ja- ma-la- jnä' hnaan' hnäh', lä-ja- ka-läh', lä-jëë' hi- ma-lä-kyuuh' ju'dsoo' hnäy' hnäh'. <sup>2</sup> Hnaan' hnäh' kih' he- tøøh' jne' kyaah' ju'dsoo' hi- lä- ma-tøøhn' ja-ba' kyaah' ju'dsoo' la- lä-jëë' joh' jmi' cha-. <sup>3</sup> Ngiin' kih' Dio hi- laa' Täa' jnän' hi- ngiin' kih' Jesucristo jooy', wa' kway' he- llu' kyah' hnäh', wa' lä-nih' dsëy' hnäh', hi- wa' jmeey' hii' ti' tuh-hoh' hnäh', lä-koö- la' ju'dsoo' kiyh' hi- lä-koö- jiih' hnäy' hnäh'.

<sup>4</sup> Peer- chaan- cha-miuh- llu' kih' he- ma-jeen' ko-llaa' gyuu- kyaah' hi- ga-nää' lä-koö- hnøø' ju'dsoo' hi- lä-koö- nuuh' he- ma-hñah' jne' kih' Täa'. <sup>5</sup> Sa- la' nuuh' hmëë' he- siin' kyah' la-. Ja-ba' nuuh' he- ga-hñah' jne' lä- ma' to-në' ba' la-. He-ja- hne- dsa-më', chuun' kyaah' hne- na', wa' lä-hnäa' jne' dsa-kyaaahn'. <sup>6</sup> He- la- ba' ja-, he- hnää' jne' dsa-kyaaahn', he- jmeen' lä-koö- jäh' nuuh' kih' Dio ba'. He- la- ja- nuuh' he- ga-nuuh' hnäh' lä- ma' to-në': he- go'taah' hnäh' hnaah' hnäh' dsa-kyaaah' hnäh'.

Dsa- hi- ta-juu'

<sup>7</sup> Jëeh', ga-nää' jwëë' hi- ta-juu' lä-kaa- jmi-gyuu', hi- sa- jmee' dsoo' ja' Jesucristo jmi-gyuu' la-, laa' jmi-ngo'. Hi- jmee' lä-ja-, hi- he' he' hi- ta-juu', hi- na-høøyh' kih' Cristo. <sup>8</sup> Leeh' hnäh' mah' sa- hee' ta' kyah' hnäh' he- ma-na'llu'. Lä-ja- ba' leh' hnäh' na'tee' jñee' hnäh'. <sup>9</sup> Wa' hi- cha- hi-, hi- dsa-kañ- jwë' cher'mah' ga-tuy' nuuh' kih' Cristo, sa- laay' kyaa' Dio. Pero hi- høø' koö- hweh- nuuh' kih' Cristo, hi- he' ba' laa' kyaah' Dio hi- laay' kyaah' Jooy' ka-läh'. <sup>10</sup> Cher'mah' jaa- hi- ga-lloo' kyah' hnäh' hi- sa- kye- nuuh' kih' Cristo lä-koö- hlëehn' la-, ta- heeh' hnäh' cha'neh' kyah' hnäh', ni- ta- jmee- hnäh' Dio kiyh'. <sup>11</sup> Jëeh', hi- jmee' Dio kiyh', he- jmeey' ko-jøh' kyaah' ta' hliih' he- jmee' dsa- he'.

<sup>12</sup> Cha- cha-ga-miuh- juu' he- hnoon' jwëëhn' hnäh', pero mo-so- ma-sii' ga' jnä', kih' he- hnoon' niin' na-jëen' hnäh' mah' llan' juu' ko-jøh' hi- lä-ja- jëë- dsë- jne' go-te'.

<sup>13</sup> Joö' dsa-më' øøh' hnäh' hi- na-lleeh' kyaa' Dio, jmeey' Dio kyah' hnäh'. Wa' la' lä-ja-.